

28 FEB 2001

PRESIDEN COLOMBIA AKAN TIBA ESOK UNTUK LAWATAN EMPAT HARI

KUALA LUMPUR, 28 Feb (Bernama) -- Presiden Colombia Andres Pastrana Arango akan tiba di sini esok bagi lawatan negara empat hari ke Malaysia.

Menurut kenyataan Kementerian Luar, lawatan itu adalah atas jemputan Yang di-Pertuan Agong Sultan Salahuddin Abdul Aziz Shah.

Pastrana akan diiringi isteri dan delegasi 60 anggota termasuk Menteri Luar, Menteri Perdagangan Luar, Menteri Pertanian dan Menteri Pendidikan serta para pegawai kanan dan anggota sektor swasta.

Semasa di sini, Pastrana dijadual akan mengadap Sultan Salahuddin yang akan menganjurkan jamuan negara bagi meraikan presiden dan delegasinya.

Pemimpin Colombia itu juga dijadual akan mengadakan perjumpaan dengan Perdana Menteri Datuk Seri Dr Mahathir Mohamad dan anggota Kabinet di Putrajaya esok.

Pastrana juga akan melawat Lembaga Kemajuan Tanah Persekutuan (Felda), Dewan Bandaraya Kuala Lumpur dan Menara Berkembar Petronas.

Beliau juga akan mengadakan lawatan singkat ke United Plantation di Teluk Intan.

-- BERNAMA

NHA ES RHM